



J. B.-CLIQUE SANTIANS Alti Garde

Basel loot d Lääde aabe

Basel isch e offeni Stadt
 sait s Stadtmarketing und findets glatt
 Für Bsuecher vo usse isch das nit so klar
 in unserer Stadt isch nit alles wunderbar
 Numme am Sunntig isch iiberall Friede und Rue
 und das isch logisch, s isch jo alles zue
 Mit de Nämme vo alle verschwundene Knille
 kennts der ganzi Zeedel fille
 E soone Lischte wotsch gaar nit lääse
 drum goots jetzt wyter zem Messewääse
 Muschtermäss und Basel World sinn scho Gschicht
 jetzt warte mir uff dr näggschti Bricht:
 Arroganz und Unvermeege gits nit nur bi Bangge
 au d Mäss Basel kennt do kaini Schrangge
 d Uhrefirme saage de Muschtermässer
 Basel bruchts nit – d Genfer sinn besser
 Wenn de noch em Mässsuech ebbis wotsch go kaufe
 kasch vo dr Gränze bis an Bahnhof laufe
 d Gschäfte hänn d Lääde aabeloo und sinn zue
 s Personal bruucht halt si Rue
 Di «glaini Wältstadt» trait de Namme mit Rächt
 fir e richtigi Wältstadt isch vyyl z vyyl no schlächt

D Kino schliesse, s isch zem Schreye
 di Junge halte sich lieber ans Neye
 und dien die Film an d Woonwand biime
 oder grad uff s Händy striime
 Yes, that's really wonderful
 so stinggts nit noch Popcorn und Red Bull
 Drfiir isch in der alte Kinostrooss
 jede Oobe dr Deyfel los:
 Statt Kino gits in däm Wonderland
 jetzt jeedi Mängi Börger-Ständ
 s Businesspeople drifft sich after work
 do gang ych lieber in d Hasebörg
 Doch me sott nit numme klaage
 s git au Positiivs zem Saage:
 im Gundeli gits, das isch kai Witz
 dr beschti Döner vo dr Schwyz
 und am Bluemerain, do kriegsch doch glatt
 s beschti Brot vo dr ganze Stadt!

E bsunder Kapitel isch d Hotellerie
 au do gits, wie kennts anderscht syy
 Licht und Schatte näbenand
 und di letschte News sinn allerhand:
 Dr Spärber und s Hotel Basel kasch nimm gniesse
 au s Merian und s Kaffi Spitz dien schliesse
 Jetzt mien mir doch – wo fiert das aane –
 e neyi Glygge-Route blaane

Aigentli hänn mir welle Fasnacht mache,
 drey Dääg pfyffe, drummle, lache
 d Grieg und s Klima emol vergässe
 und gmietlig Suppe und Waaie ässe
 Aber so wies uusgseet, wirts kai Gnuss
 Vogelfrey gseet anderscht uss
 Als Glygge stinggt uns das saumässig
 mir findes iberhaupt nit lässig
 wänn mir fir e Halt, e schnälle,
 s Dringge bim Velokurier mien bschtelle
 Fir e Alti Garde isch es schwär z verstoo
 ass me d Lääde so ka aabeloo
 und Baizehogger findes nit nätt
 ass es immer weeniger Baize hätt
 Derfir gits – und dasch nit zum Lache
 e baar, wo uff Schickimicki mache
 s isch klar, wo das duet anefiere:
 zem e Stange go suffice, muesch bald reserviere

Das Ganzi isch druurig, drum ligts uff dr Hand
 mir laufe alli im schwarze Gwand
 Nur d Ladärne lychtet rosaroot
 will s Lääbe trotz allem wytergoot
 und das isch e Drooscht – und nit e glaine –
 drum geen mir in d Baiz und nämme no aine

* * * * *

PS:

D Ladäärne-Uusstellig uff em Minschterplatz und d Waage- und
 Reggwisyte-Uusstellig bi dr Kasäärne sin vom Määntig znacht bis
 am Mittwoch demoorge!

Deert und an de 3 Verkaufsständ (CINS) in dr Stadt ka men au alli
 Zeedel und Schnitzelbängg, d Blaggedde und dr Rädabäng kaufe.

